

Predavač M. građ. **Faruk Dizdarević**, dipl.ing.građ. je rođen 07.02.1942. u Vitini, Opština Ljubuški. Diplomirao je 1967. godine na Građevinskom fakultetu Univerziteta u Sarajevu gdje mu je 2010. godine priznato zvanje Magistra struke.

Prvih deset godina inženjerskog iskustva stekao u građevinskom preduzeću GP Put Sarajevo, i to u oblasti niskogradnje na projektovanju i izgradnji mostova i saobraćajnica na magistralnim i autoputevima. U Keniji radio 4,5 godine na izgradnji puteva, aerodroma i zgrada, gdje se, u kontaktima sa uglednim engleskim i njemačkim konsultantskim firmama, prvi put upoznaje sa FIDIC ugovorima. Učestvovao u projektima armirano betonskih mostova preko rijeke Tinje na putu Brčko-Lončari, rijeke Majdanke na putu Sanski Most – Prijedor i rijeke Spreče na putu Tuzla-Doboj. Za mostove na dionici Bar-Ulcinj i autoputu Beograd-Novi Sad projektovao tehnologiju izgradnje, fundiranje, skele i montažu. Poznatiji i veći objekti iz ovog perioda su: Aerodrom Sarajevo, put Tuzla-Doboj, autoput Beograd-Novi Sad, jadranska magistrala Bar-Ulcinj, više dionica u Keniji na putu Mombasa-Najrobi-Nakuru, Kitale Kapengurija, aerodrom Najrobi.

Kao gost vlade Republike Francuske, proveo četiri sedmice u Parizu na seminaru iz oblasti izgradnje i održavanja infrastrukturnih objekata u urbanim sredinama.

Drugi period od deset godina radio u oblasti izvođenja objekata visokogradnje sa posebnim rješenjima zaštite građevinskih jama, fundiranja i montažne gradnje, a naročito na izgradnji pogona za proizvodnju montažnih prednapregnutih stropnih konstrukcija i mostovskih nosača. Veći objekti i naselja iz ovog perioda su: naselje Ciglane, Dobrinja i Mojmiilo u Sarajevu, učešće u izgradnji objekata XIV zimskih olimpijskih igara u Sarajevu (Zetra, Mojmiilo).

U periodu 1987-1992 vodio projekat izgradnje Kliničkog centra u Sarajevu na lokaciji Koševo, kada je sa brojnim multidisciplinarnim projektantskim timovima radio na programiranju, projektovanju i nadzoru izgradnje sistema objekata i infrastrukture vrijedne 250 miliona KM od čega je prije rata realizovano više od 145 miliona KM.

U Mostar dolazi 1995. godine sa grupom stručnjaka kada radi na obnovi objekata i infrastrukture. Po povratku u Sarajevo radi u Federalnom ministarstvu prostornog uređenja i okoliša te u PIU Housing. Po prestanku rada PIU Housing radi u GP Butmir do odlaska u mirovinu 2005. Ističe se učešće na izgradnji objekata Bosmal, poslovno-trgovačkih centara Merkator i Robot te rekreacionog centra Termalna rivijera na Ilidži.

Radio kao član i predsjednik komisije za polaganje stručnih ispita pri Federalnom ministarstvu prostornog uređenja, iz oblasti Organizacija i nadzor građenja.

Na osnovu bogatog iskustva u zemlji i inostranstvu, a posebno vezano za FIDIC ugovore, učestvuje u nadgradnji u poslovima Međunarodnih ugovora u oblasti infrastrukture. Od 2000. godine učesnik više seminara iz oblasti upravljanja projektima, rješavanja sporova i medijacije, a sa radnom grupom, za potrebe UKI BiH radi na prevodu tri osnovna priručnika Opštih uslova FIDIC ugovora: crvena, roza i žuta knjiga, od kojih je posljednja, žuta knjiga, prezentirana jula 2013. godine.